

Aalajangiiffigisassatut siunnersuut, Naalakkersuisut misissuinissamut suliakkerneqarnissaat, saqqummiutissallugu innuttaasut aningaasaataannut qanoq sunniuteqartigissanersoq suliaritittussat utaqqisarnerisa annikilliseriaqqinnissaanut suliniut. Misissuineq paasissutissiissaaq suut periarfissaanersut utaqqisut ikilisinnissaannut aammalu aningaasartuutissat suussanersut. Misissuineq siunnersuutunik imaqassaaq.

(Inatsisartunut ilaasortaq Justus Hansen, Demokraatit)

Akissuteqaat

(Peqqissutsimut Naalakkersuisoq, Doris Jakobsen)

Aappassaaneerinnineq

Ataatsimiititaliap isumaliutissiissutaanut inassuteqaataanullu Naalakkersuisut qujapput. Oqaloqatigiiffiusumik ataatsimeeqatigiinnermut ataatsimiititaliap qaaqqusinera Naalakkersuisut aamma qujassutigaat suliaritinnissamullu utaqqinerup sivisussusiata oqaloqatigiissutiginnissaanut periarfissineqarnertik nuannaarutigalugu.

Suliaritinnissamut utaqqisarnerup sivisussusia peqqinnissaqarfimmit politikerinillu eqqumaffiguarneqartariaqartoq Naalakkersuisut isumaqarput. Taamaattumik suliaritittussat utaqqisarnerisa annikillisinneqarnerat piffissami Inatsisartut suliassaqarfimmut amerlanerusunik aningaasaliineranni pisoq Naalakkersuisunit assut naammagisimaarneqarpoq.

Peqqinnissaqarfimmi Naalakkersuisunilu naliliineq malillugu aningaasaliissutit aalajangersimasut kiisalu peqqinnissaqarfimmi iliuusissat nutaat, assersuutigalugu napparsimasut pillugit qarasaasiakkut nalunaarsuissutip nutaap, aqputiginerisigut suliassaqarfimmi pingaarnersiuinikkut piffissat utaqqiffiusartut maanna aalaakkaasumik inissisimapput sulilu sivikilleriaqqissallutik.

Napparsimasut tamarmik assigiimmik pineqartariaqartut aammalu suliaritinnissat tassanngaannartut tassanngaannartuunngitsullu kisimik immikkoortinneqartariaqartut Naalakkersuisut isumaqarput. Napparsimasut pilertortumik suliaritittussaangitsut immikkoortinneqarneranut nikingassutaasup aqunnissaa ajornassaaq pilersortuunngitsumik suliaritittussat pilersaarusiornissaannut sanilliullugu. Aappaattut Naalakkersuisut isumaqarput inuit peqqinnissaqarfimmi iliuuseqarfigineqartarnerat tunngaviusumik isigalugu isertitat ilinniagaqassuserlu tunngavigalugit immikkoortitsiviusariaqanngitsoq.

Ataatsimiititaliami amerlanerussuteqartut siunnersuut itigartinneqassasoq inassutigimmassuk Naalakkersuisunit naammagisimaarneqarpoq. Ataatsimiititaliami ikinnerussuteqartut siunnersuummut inassuteqaataanni siunertarineqartoq tunuliaqutaasorlu Naalakkersuisunit iluarisimaarneqarpoq. Naalakkersuisut isumaqarput inuiaqatigiit peqqinnissakkut sunniuteqarluartumik periaaseqarnissamik pisariaqartitsinerat innuttaasullu sapinngisamik

amerlanerpaat sulinissaannik pisariaqartitsineq utaqqisut nalunaarsorsimaffiannit piffissarlu utaqqiffiusartoq annikillisinneqarneratigut aaqqiivigineqareersoq.

Taama oqaaseqarlutik Naalakkersuisut inassutigaaq siunnersuut itigartinneqassasoq.